

四庫全書

經部

欽定四庫全書

經部

周禮述註卷二

詳校官監察御史臣施朝幹

刑部郎中臣許兆椿覆勘

總校官進士臣朱鈐

校對官員外郎臣張慎和

謄錄監生臣王家賓

欽定四庫全書

經部四

周禮述註

禮類一 周禮之屬

提要

臣等謹案周禮述註二十四卷

國朝李光坡撰光坡字耜卿號茂夫安溪人大
學士光地之弟也杭世駿榕城詩話稱其家
居不任潛心經學著有三禮述註此即其一
也其書取註疏之文刪繁舉要以著訓詁之

源又旁採諸家參以己意以闡制作之義雖
於鄭賈名物度數之文多所刊削而析理明
通措詞簡要頗足為初學之津梁考其兄光
地榕村集中有周官筆記一卷皆標舉要義
不以考證辨難為長其姪鍾倫亦有周禮纂
訓與光坡此書體例相近蓋其家學如是也
宋儒喜談三代故講周禮者恒多又鑒於熙
寧之新法故恒牽引末代弊政支離詰駁於

註疏多所攻擊議論盛而經義反淆光坡此
書不及漢學之博奧亦不至如宋學之蔓衍
平心靜氣務求理明而詞達於說經之家亦
可謂適中之道矣乾隆四十六年十月恭校
上

總纂官臣紀昀臣陸錫熊臣孫士毅

總校官臣陸費墀

欽定四庫全書

周禮述註卷一

安溪李光坡撰

周禮六篇其冬官一篇缺漢藝文志序列於禮家後
人名之曰周禮周禮最後出蓋秦自孝公已下用商
君之灋其政酷烈與周官相反故始皇禁挾書特疾
惡欲絕滅之搜求焚燒之獨悉漢文帝嘗召至魏文
侯時老樂工因得春官大司樂之章景帝子河間獻

王好古學得周官五篇失其冬官一篇乃購千金不
得取攷工記以補其缺武帝求遺書得之藏於祕府
禮家諸儒皆莫之見哀帝時劉歆校理祕書始著於
錄畧歆門人河南杜子春能通其讀鄭衆賈逵受業
於杜漢末馬融傳之鄭子玄玄所註行於世宋程子
張子甚尊信之朱子謂此經周公所作但當時行之
恐未能盡後聖雖復損益可也至若肆為排舛毀訾
之言則愚陋無知之人耳以冬官之缺五篇頗為諸

儒所亂深疑其附離非實故仍舊本

天官冢宰第一

披聞之兄曰天者君也官猶司也冢宰所司者君之事故曰天官宰者調和膳羞之名冢大也君德者萬化之本而飲食盡道者又君德之本也冢宰掌王之飲食男女之事使皆有其節度此體信之道其為宰也大矣君正而推以均四海不過用水火金木飲食必時合男女頒爵位

卷一
必當年德而萬物自育天地自位是調和膳羞
其事至小而實大其義至近而實遠以此名官
非喻也深哉知孔子無間於禹之心即得周公
立冢宰之意

惟王建國

註曰建立也 疏曰自此至以為民極五句六官之
首同此序者以其建國設官為民不異故也

辨方正位

坡謂辨方辨其山林川澤邱陵墳衍原隰之方也正位致日景求地中正王國之位也

體國經野

坡謂體猶分也體國分五百里至百里五等之國也經謂為之里數野都鄙之地也

設官分職

鄭司農曰置冢宰司徒宗伯司馬司寇司空各有所職而百事舉

以為民極

朱子曰極者標準之名 王次點曰宅中建國四方
輻湊至斯為極詩曰商邑翼翼四方之極是也設官
分職治教禮政刑事無不畢舉何往非民之極書曰
皇建其有極是也

乃立天官冢宰使帥其屬而掌邦治

鄭司農曰邦治謂總六官之職也

以佐王均邦國

註曰佐助也 呂伯恭曰天之所以立君命相不過欲均平天下之不平者爾令四海之內貴者貴賤者賤士農工商鰥寡孤獨事事物物咸適其宜則均道盡矣 帥音率後同輻音福

治官之屬

疏曰別言此句與下六十官為總目不唯指此一經而已

大宰卿一人小宰中大夫二人宰夫下大夫四人上士

八人中士十有六人旅下士三十有二人

註曰變豕言大進退異名也百官總焉則謂之豕列職於王則稱大豕大之上也山頂曰豕旅衆也下士治衆事者自大宰至旅下士轉相輔貳皆王臣也王之卿六命其大夫四命士以三命而下為差

府六人史十有二人

註曰府治藏史掌書者凡府史皆其官長所自辟除陳君舉曰上之不可以為士下之不止於為農則

任以府史之職 疏曰府史大例皆府少而史多而
府又在史上惟有御史百二十人特多而在府上以
其掌贊書數多也有府有史者以其當職事繁故也
有史無府者以其事少得史即足故也角人羽人等
直有府無史以其文書少而有稅物須藏之也腊人
食醫等府史俱無者以其專官行事更無所須故也
惟有天府一官特多於史以其所藏物重故也

胥十有二人徒百有二十人

註曰此民給徭役者若今衛士矣胥讀如譎謂其有才知為什長 疏曰有胥必有徒胥為什長故也腊人之類有徒無胥者得徒則足不假長帥也食醫之類胥徒並無者專官行事不假胥徒也禮記王制云下士視上農夫食九人祿足以代耕則府食八人史食七人胥食六人徒食五人祿其官竝亞士故號庶人在官者也 大音泰後皆故此譎音胥

或問辨方正位體國之說異於註何也曰非敢臆

解據從大司徒成文也今試即是而推言之則見王者立國先辨方土民物之宜相民宅知利害而後正王國是其天下為家厚下安宅而不徒於一人計安享之利矣次之以體國經野則建邦設都以蕃王室以亂非民指臂之勢成而中土永奠八字之中廣大精密規模宏遠焉註說雖善然緣文生義或偶未察於司徒之全文也 或問典命文大夫無中下之別此序官則有中下大夫何也曰

疏云四命大夫自分為中下似若侯伯同七命子男同五命爵則有高下不同也曰註言士以三命而下為差信乎曰信王之士命數不著於典命惟大行人掌客職云士眡諸侯之卿禮參於典命所謂公之卿三命子男之卿再命則註信矣

宮正上士二人中士四人下士八人府二人史四人胥四人徒四十人

註曰正長也宮正主宮中官之長

○宮伯中士二人下士四人府一人史二人胥二人徒二十人

疏曰伯長也主宮中卿大夫士之適子庶子凡六官序官之濶其義有二一則以義類相從謂若宮正宮伯同主宮中事膳夫庖人內外饗同主造食之類故連類序之二則凡次序六十官不以官之尊卑為先後皆以緩急為次第故此宮正之第士官為前內宰等大夫官為後也

膳夫上士二人中士四人下士八人府二人史四人胥十有二人徒百有二十人

註曰膳之言善也今時美物曰珍膳膳夫食官之長禮庫曰宮正宮伯之下即以食官系之緣此事甚繫利害非惟是養人主氣體專是正君之心防君之欲記曰飲食男女人之大欲存焉使下之所共必以之正人主雖欲少肆其欲亦不可得若無常制而共之者惟求以投其好則縱欲何極若周官所共各有

定灑又且一一闕涉冢宰冢宰得人則食官皆正誰敢以四方珍味私投主欲古者格君心皆在此處

○庖人中士四人下士八人府二人史四人賈八人胥四人徒四十人

註曰庖之言苞也裹肉曰苞苴賈主市買知物賈

○內饗中士四人下士八人府二人史四人胥十人徒百人

註曰饗割烹煎和之稱 疏曰掌王后世子及宗廟

皆在內之事

○外饗中士四人下士八人府二人史四人胥十人徒百人

疏曰掌外祭祀及饗孤子耆老皆在外之事

○亨人下士四人府一人史二人胥五人徒五十人

註曰主為內外饗煮肉者 賈音嘏亨普庾反註同

物賈之賈與價同

甸師下士二人府一人史二人胥三十人徒三百人

註曰郊外曰甸師猶長也甸師主共野物官之長

疏曰此官主地事不在地官者以其供野之薦又給薪蒸以供亨飪故在此次亨人也徒三百人特多者天子藉田千畝藉借此三百人耕耨故多也

○獸人中士四人下士八人府二人史四人胥四人徒四十人

○廩人中士二人下士四人府二人史四人胥三十人徒三百人

疏曰徒亦三百人者馬融云池塞苑園取魚處多故也

○斃人下士四人府二人史二人徒十有六人

○腊人下士四人府二人史二人徒二十人

疏曰註腊之言夕也或作久字久乃乾成義亦通

坡謂自甸師至此以備膳夫之食用六穀膳用六牲

珍用八物羞用百有二十品者也 斃音魚腊音昔

食音嗣

醫師上士二人下士四人府二人史二人徒二十人

註曰醫師衆醫之長 疏曰醫亦有齊和飲食之類
故設在飲食之間也

○食醫中士二人

註曰食有和齊藥之類 黃文叔曰秦醫和謂趙孟
曰國之大臣榮其寵祿全其大節有禍災興而無改
焉必受其咎今君至於淫以生疾主不能禦吾是以
云良臣將死也夫師之教訓傅之德義保其身體冢
宰之事也周冢宰必兼三公使其燥濕寒暑之不戒

飲食起居之不節而疾生焉則何以為師保故食藥之調適飲膳為詳而醫師奉王之事屬於豕宰豈可苟而已哉

○疾醫中士八人

○瘍醫下士八人

註曰瘍創癰也

○獸醫下士四人

註曰獸牛馬之類

瘍音羊後同創音瘡

酒正中士四人下士八人府二人史八人胥八人徒八十人
註曰酒正酒官之長

○酒人奄十人女酒三十人奚三百人

奄精氣閉藏者不稱士則亦府史之類以奄為異也
女酒女奴曉酒者古者從坐男女沒入縣官為奴其
少才知者以為奚女酒三十人與奚為什長若胥徒
也奚三百人以其造酒故多也

○漿人奄五人女漿十有五人奚百有五十人

○凌人下士二人府二人史二人胥八人徒八十人

註曰凌冰室也

○籩人奄一人女籩十人奚二十人

註曰竹曰籩

○醢人奄一人女醢二十人奚四十人

註曰醢豆實也不謂之豆此主醢豆不盡于醢也

疏曰天子豆百二十公四十侯伯三十二子男二十

四上大夫二十下大夫十六彼有腳腫曉截炙膾之

屬其數甚多是豆不盡盛醯而已

○醯人奄二人女醯二十人奚四十人

○鹽人奄二人女鹽二十人奚四十人

○冪人奄一人女冪十人奚二十人

註曰以巾覆物曰冪 坡謂自酒正至此又以備膳

夫之飲用六清醬用百有二十饗者也 冪莫歷反

脚音香臙音熏腕音鵠載音恣

宮人中士四人下士八人府二人史四人胥八人徒八

十人

薛平仲曰太宰為人君身心之防自宮正至宮伯自膳夫至膳人自酒正至冪人所以密邇於王者夫皆王宮內人而猶未及于外也宮人掌六寢之脩而及于四方之舍事掌舍而下又皆為王之會同于國外者設焉則內外出入之際其為王躬之是保者始悉

○掌舍下士四人府二人史四人徒四十人

註曰舍行所解止之處

○幕人下士一人府二人史二人徒四十人

註曰幕帷覆上者

○掌次下士四人府四人史二人徒八十人

註曰次自修止之處 鄭剛中曰舍者久留之辭次者暫止之義 幕武博反

大府下大夫二人上士四人下士八人府四人史八人
賈十有六人胥八人徒八十人

註曰大府為王治藏之長若今司農矣 疏曰洪範

云一曰食二曰貨已上皆言飲食此次言貨賄故大府在此也有賈者府官須有市買并須知物貨善惡故也 禮庫曰自大府至外府掌守財賦

○王府上士二人中士四人府二人史二人工八人賈八人胥四人徒四十有八人

註曰工能攻玉者

○內府中士二人府一人史二人徒十人

註曰內府主良貨賄藏在內者

○外府中士二人府一人史二人徒十人

註曰外府主泉藏在外者 大如字

司會中大夫二人下大夫四人上士八人中士十有六人府四人史八人胥五人徒五十人

註曰會大計也司會主天下之大計計官之長若今尚書 禮庫曰自司會至職歲掌會計財賦

○司書上士二人中士四人府二人史四人徒八人

註曰司書主會計之簿書

○職內上士二人中士四人府四人史四人徒二十人
坡謂職內主賦入之簿書

○職歲上士四人中士八人府四人史八人徒二十人
坡謂職歲主賦出之簿書謂之歲者歲計之也

○職幣上士二人中士四人府二人史四人賈四人胥
二人徒二十人

○司裘中士二人下士四人府四人史四人徒四十人
○掌皮下士四人府二人史四人徒四十人

列職于此者皮幣相次也 陳君舉曰古之皮幣乃
國家所重天府所用甚廣故禮贄皆以皮幣為主觀
當時皮事無所不會惟王不會故知出入之數極多
大較與貨賄相敵此所以亦屬宰府皆司會為之長
會古外反

內宰下大夫二人上士四人中士八人府四人史八人
胥八人徒八十人

註曰內宰宮中官之長 陳君舉曰婦人女子常與

至尊幽居九重人弗得見驕恣何所不至故使之分
職于六宮附屬于大宰而天宮內宰春官世婦又得
以參檢其事與夫婦妾賤人自相使令而無畏忌者
不同矣漢高愛戚夫人子留侯曰骨肉之間雖臣等
百人何益袁盎卻慎夫人坐文帝怒說以人彘乃從
使大臣得與內事其如是乎

○內小臣奄上士四人史二人徒八人

註曰奄稱士者異其賢 李氏曰周禮其餘奄皆不

命也唯內小臣則有奄上士四人而已夫宦官指其
居次則或在帷薄之內論其職掌則或聞牀第之言
固不可以詘辱後又渾淆男子其用奄人是乃制事
之宜 徐氏曰王左右前後罔非正人使王出入起
居罔有不欽後世尚有講明此事者若后之左右前
後擇人而任之則千載之曠事無有明君賢相念及
于此何也閨門出治之原闢睢王化之始有內聖外
王之學者必不忽于斯

○闔人王宮每門四人圍游亦如之

註曰闔人司昏晨以啓閉者刑人墨者使守門圍御苑也游離宮也

○寺人王之正內五人

寺之言侍奄人也故寺人披自稱刑人正內后之路寢也若王之路寢不稱內

○內豎倍寺人之數

註曰豎未冠者之官名

九嬪

註曰嬪婦也昏義曰古者天子后立六宮三夫人九嬪二十七世婦八十一御妻以聽天下之內治以明章婦順故天下內和而家理也不列夫人于此官者夫人之于后猶三公之于王坐而論婦禮無官職

○世婦

註曰不言數者君子不苟于色有婦德者充之無則闕

○女御

註曰昏義所謂御妻御猶進也侍也

○女祝四人奚八人

○女史八人奚十有六人

劉執中曰女史八人蓋擇嬪御之賢者為之 鄭剛

中曰古者天子有史官左記言右記動故為天子者不敢有過舉后與王同體言動不謹則家道不齊無以舉天下之內治故有女史 嬪皮賓反後同

典婦功中士二人下士四人府二人史四人工四人賈

四人徒二十人

註曰典主也典婦功者主婦人絲枲功官之長

○典絲下士二人府二人史二人賈四人徒十有二人
○典枲下士二人府二人史二人徒二十人

枲絲里反後同

內司服奄一人女御二人奚八人

註曰內司服主宮中裁縫官之長有女御者以衣服
進或當于王廣其禮使無色過

○縫人奄二人女御八人女工八十人奚三十人

○染人下士二人府二人史二人徒二十人

○追師下士二人府一人史二人徒四人

註曰追治玉石之名

○屨人下士二人府一人史一人工八人徒四人

疏曰追師專掌婦人首服此兼男子屨舄者下體賤故

同在此官也 追丁回反一曰雕舄音昔

夏采下士四人史一人徒四人

註曰夏采夏翟羽色禹貢徐州貢夏翟之羽有虞氏
以為綏後世或無故染鳥羽象而用之謂之夏采
坡謂自治官之屬至此辨其內外之職名次其爵秩
之貴賤列其正師司旅之多寡等其府史胥徒之繁
簡則設官之事也後倣此 夏戶雅反綏如誰反

周禮述註卷一

欽定四庫全書

周禮述註卷二

安溪李光坡撰

太宰之職掌建邦之六典以佐王治邦國

建邦猶湯誥稱造邦也後倣此典常也經也灋也國天子諸侯所理也邦疆國之境

一曰治典以經邦國以治官府以紀萬民

坡謂經者理使畫一也治者分職稽功也紀者詳理

而不遺也

二曰教典以安邦國以教官府以擾萬民

坡謂安者治生明倫則邦本固是安之也教者教以善民之道也擾者順其性之固有而又敷之以寬也

三曰禮典以和邦國以統百官以諧萬民

坡謂和者禮行則上下和親而不陵犯也統者禮辨儀等所以繫合之也諧者防以中和使民無乖戾也

四曰政典以平邦國以正百官以均萬民

坡謂物各當其分之謂平如九疋九伐所云也正者
治朝位詔爵祿之等均者均役使均賦斂使無多寡
之偏也

五曰刑典以詰邦國以刑百官以糾萬民

註曰詰猶禁也

六曰事典以富邦國以任百官以生萬民

坡謂任任之以事也生猶養也六者天子所以治畿
內及侯國而諸侯亦得用之以治其封內者故邦國

之治可以典待之也上二典言官府下四典言百官
冢宰之治司徒之教于官府無所不行也禮政刑事
百官有其職則承之夫治典立則君德修紀綱定教
化可施矣故以教典次之教之而有淺深厚薄之不
齊者當有禮以一之故禮典又次為禮之所不能範
者大則威之以兵小則糾之以刑故政刑又次焉禮
樂政刑四達不悖則君可安富民得永賴故事典終
焉疏曰自此以下至職末分為二段從此職首至

以富得民一段十條明經國之大綱治政之條目自
正月之吉以下至職末明頒宣前灋依事而施

以八灋治官府

坡謂六典非官不舉故繼之以治官府也百官所居

曰府

一曰官屬以舉邦治

註曰官屬謂六官其屬各六十

二曰官職以辨邦治

官職謂六官之職也官有職則事各有司存故曰辨

三曰官聯以會官治

註曰聯謂聯事通職相佐助也

四曰官常以聽官治

官常自領其官之常職不聯也

五曰官成以經邦治

註曰鄭司農曰官成謂官府之成事品式也小宰曰

以八成經邦治

六曰官灋以正邦治

官灋謂職所主之灋度官職主祭祀朝覲會同賓客者則皆自有其灋度正者使得其序也

七曰官刑以糾邦治

刑謂五刑也

八曰官計以弊邦治

註曰弊斷也官計謂小宰之六計所以斷羣吏之治

坡謂八灋皆云邦治官聯官常言官者官聯則取

會合衆官乃始得治官常則取官有常職各自治其
官也首之以官屬官職者設官而分職也次之以官
聯官常則官職可得而修矣官成官灋聯者聯此也
常者常此也官刑以糾其怠玩官計以稽其功臯故
其序如此 灋古法字臯古罪字俱後同

以八則治都鄙

由朝廷而至畿內故次以治都鄙焉則亦灋也典灋
則所用異其名耳有宗廟國邑曰都以在國郊曰

鄙都鄙公卿大夫之采地王子弟所食邑周召毛聃
畢原之屬在畿內者

一曰祭祀以馭其神

馭約使受制也祭祀其先君社稷五祀馭其神使之
無僭祀無淫祀也 禮庫曰鬼神本無聲與形然亦
可馭只祭所當祭合於理便馭得如後世淫祀徼福
先自失矣如何馭得鬼神便見出來興妖起怪此理
甚明

二曰灋則以馭其官

灋則謂宮室車旗衣服之等皆不得僭也官伍兩殷輔也

三曰廢置以馭其吏

廢猶退也退其不能者舉賢而置之吏即官也

四曰祿位以馭其士

註曰祿若今月俸也位爵次也鄭司農云士謂學士

五曰賦貢以馭其用

賦什一之稅也貢九職之功所貢也馭用入供其出
奢不犯上儉不廢禮也

六曰禮俗以馭其民

註曰禮俗昏姻喪紀舊所行也

七曰刑賞以馭其威

刑賞皆言威者威畏服之心志也

八曰田役以馭其衆

田以簡衆役以任衆也 坡謂八者之序其上四者

卷二
自神而人自尊而卑治貴之事也其下四者富而教之教而用之治賤之事也

以八柄詔王馭羣臣

六典八灋八則以治邦國官府都鄙有政治則有功過有功過則有賞罰矣柄所執以起事也詔告也助也此與下八統獨言詔王者餘皆羣臣職務常所依行歲終致事乃攷知得失此乃王所操持王不獨執羣臣佐之而已

一曰爵以馭其貴

註曰爵謂公侯伯子男卿大夫士也

二曰祿以馭其富三曰予以馭其幸

註曰幸謂言行偶合于善則有以賜予之以勸後也

四曰置以馭其行

行賢行也

五曰生以馭其福

生者臣之罪可殺而有八議之辟賜之更生以福之

也

六曰奪以馭其貧

註曰奪謂臣有大罪沒入家財者

七曰廢以馭其罪八曰誅以馭其過

註曰廢猶放也誅責讓也 坡謂爵祿予置順天命

也生奪廢誅彰天討也 予音與行下孟反

以八統詔王馭萬民

統者統合于上而繫屬于下也八者民與在上同有

此物事上行之下效之故曰馭萬民也

一曰親親二曰敬故三曰進賢

註曰賢有善行也

四曰使能

註曰能多材藝也

五曰保庸

註曰保庸安有功者

六曰尊貴七曰達吏

註曰達吏察舉勤勞之小吏也

八曰禮賓

註曰禮賓賓客諸侯 坡謂此詔王敦其德心以為
賞罰之本也與秋官八議相表裏然親親敬故盡乎
孝進賢使能保庸尊貴盡乎弟達吏禮賓盡乎慈人
君躬行于上則民興起于下而孝弟不倍之俗成矣
以九職任萬民

坡謂欲民遂其興起之心必有厚生之道以處之而

使之有常業者厚生之道也故以九職任之焉

一曰三農生九穀

三農平地山澤也九穀黍稷秬稻麻大小麥大小豆
一說無秬大麥而有梁菰

二曰園圃毓草木

樹果蔬曰圃園其樊也圃在田畔王龜齡曰園圃藪
牧舉其地以及其民

三曰虞衡作山澤之材

註曰虞衡掌山澤之官主山澤之民者 疏曰山澤之民無名號故借虞衡之官以表其民也

四曰藪牧養蕃鳥獸

註曰澤無水曰藪牧牧田在遠郊皆畜牧之地 坡

謂園圃山澤藪牧此三者三農之兼職也

五曰百工飭化八材

飭勤也八材骨曰切象曰磋玉曰琢石曰磨木曰刻

金曰鏤草曰剝羽曰斨

六曰商賈阜通財賄

註曰行曰商處曰賈阜盛也金玉曰貨布帛曰賄

七曰嬪婦化治絲枲

嬪婦人之美稱也化絲而治之以為帛化枲而治之
以為布

八曰臣妾聚斂疏材

臣妾男女貧賤之稱疏草實若菱芡之屬材木實若
榛栗之屬

九曰閒民無常職轉移執事

閒民謂單丁下戶無力者轉移為人執事若今傭賃也坡謂外而農工商賈內而織紵組紃則生人之事盡矣而又不遺乎疏材以備五禮之物能因乎臣妾閒民以佐人力之不逮裁成輔相可謂周且密矣此九功之所出也 紵音述苾音瓜苾力果反紃音旬

以九賦斂財賄

有以任之而後可以斂之財泉穀也

一曰邦中之賦

註曰邦中在城郭者

二曰四郊之賦

註曰四郊去國百里

三曰邦甸之賦

註曰邦甸二百里

四曰家削之賦

疏曰三百里名削其中有大夫采地謂之家故名家
削采地中賦稅入大夫家采地外其地為公邑公邑
之內其民出賦入王家故舉家削以表公邑之民也
五曰邦縣之賦六曰邦都之賦

邦縣四百里邦都五百里卿采曰縣公采曰都舉以
表公邑者如家削

七曰關市之賦

關市者王畿四面皆有關門及王之市廛其賦廛布

也

八曰山澤之賦

山澤山農澤農也

九曰幣餘之賦

註曰幣餘百工之餘自邦中至幣餘每處為一書所待異也鄭司農云邦中之賦二十而稅一各有差

削本亦作稍又作郛所教反

以九式均節財用

有以斂之則可以共用矣式謂用財之節度均之則無有餘不足之患節之則無過不及之差

一曰祭祀之式

疏曰謂若大祭次祭用大牢小祭用特牲之類

二曰賓客之式

疏曰謂若上公饗餼九牢殮五牢五積之類

三曰喪荒之式

喪王后世子以下及弔諸臣皆是也喪有含襚贈奠

賙贈之數荒有施惠散利之等而皆有制焉

四曰羞服之式

疏曰謂王之膳羞衣服所用也

五曰工事之式

註曰工作器物者

六曰幣帛之式

坡謂幣帛之式謂給作幣帛之費也

七曰芻秣之式

芻秣養牛馬者草謂之芻穀謂之秣

八曰匪頒之式

鄭司農曰匪分也頒謂頒賜也

九曰好用之式

註曰好用燕好所賜予 坡謂王之羞服至貴而列
于祭祀三者之後則明人君之不為珍羞侈服而奉
先思孝接下思恭其先也工事幣帛芻秣上係乎祭
祀賓客喪荒羞服之典而下關於匪頒好用之共故

其序如此 好呼報反積音恣含去聲賻音附賵音
奉

以九貢致邦國之用

此諸侯邦國歲之常貢也凡貢各以其所有致者若
其自至然胡五峯曰授民以田則責之賦授諸侯以
國則責之貢賦者養上之禮貢者事上之義

一曰祀貢

鄭司農曰祀貢犧牲包茅之屬

二曰嬪貢

註曰嬪貢絲枲

三曰器貢

註曰器貢銀鐵石磬丹漆也

四曰幣貢

註曰幣貢玉帛皮馬也

五曰材貢

註曰材貢樵榦栝栢籬蕩也

六曰貨貢

註曰貨貢金玉龜貝也

七曰服貢

服貢絺紵玄纁織纊之屬

八曰旉貢

註曰旉貢羽毛

九曰物貢

註曰物貢雜物魚鹽橘柚

坡謂祀貢以歆神嬪貢

以共喪祭及百用器貢禮樂之材先此三者以其尊也幣以為禮材以辦公器貨以給用次此三者以其急也服者一身之共游者旌旗之飾物者口腹之需後此三者恭儉之主皆以為卑而可緩者也合而言之則所謂服食器用也所謂不貴異物賤用物也

游音游穰勅倫反榦古旦反栝音栝籐西了反蕩音蕩柚羊九反

以九兩繫邦國之民

兩猶耦也上下相合耦也繫聯綴也

一曰牧以地得民

牧謂州長及諸侯各有封域以居民也

二曰長以貴得民

長都鄙主也采地不世襲故云貴也

三曰師以賢得民

師師氏賢德行也

四曰儒以道得民

儒保氏道六藝也師儒所得之民學子也

五曰宗以族得民

宗繼別為大宗收族者所得之民其族人也

六曰主以利得民

主采邑宰也利者地親情熟有緩急之利也

七曰吏以治得民

吏鄉遂公邑之吏

八曰友以任得民

同志曰友任相信任也學校之友相任以道則以道而相得鄉田之友相任以事則以事而相得

九曰藪以富得民

註曰藪亦有虞掌其政令為之厲禁使其地之民守其材物以時入于王府頒其餘于萬民富謂藪中材物坡謂上文于萬民既言馭之任之矣然民心無常難合易睽使散而不繫與繫之而不以道將無以為施政之地也故以九兩終之焉牧與長繫其貴貴

之心使肅于分而不敢離也師與保繫其賢賢之心使明于義而知不可離也宗與主繫其親親之心使洽于恩而不忍離也牧長勢遠有無牧長者復有吏以治之師保分嚴且有非士者皆有友以維之宗主之所不逮且無宗主者又有數以利之則其不敢不可不忍之心益固結而無遺矣 行下孟反

正月之吉始和布治于邦國都鄙

正月周之正月吉謂朔日始和者如始冰始凍之類

周以建子為正一陽初動和氣之始也此一節乃下文之總目言邦國都鄙則官府萬民在其中矣 朱子曰文定春秋說夫子以夏時冠周月以周正紀事謂如公即位依舊是十一月只是孔子改正作春正月某便不敢信恁地時二百四十二年夫子只證得箇行夏之時四字據今周禮有正月有正歲則周實是元改作春正月夫子所謂行夏之時只是為他不順故改從建寅

○乃縣治象之灋于象魏使萬民觀治象挾日而斂之
象魏闕也雉門之外兩觀闕高巍巍然從甲至甲謂
之挾日凡十日 坡謂此布治于萬民之事也

○乃施典于邦國而建其牧立其監設其參傅其伍陳
其殷置其輔

註曰乃者更申飭之以侯伯有功德者加命作州長
謂之牧所謂八命作牧者監謂公侯伯子男各監一
國書曰王啟監厥亂為民參謂卿三人伍謂大夫伍

人殷衆也謂衆士也王制諸侯士二十七人上九中九下九輔府史庶人在官者也疏曰伍言傅者上有卿下有士受上政傅于下受下政傅于上故云也坡謂此布治于邦國之事也

○乃施則于都鄙而建其長立其兩設其伍陳其殷置其輔

註曰長謂公卿大夫王子弟食采邑者兩謂兩卿不言三卿者不足于諸侯坡謂此布治于都鄙之事

也 疏曰上文都鄙在官府下此在上者欲見都鄙置
臣與諸侯同又見諸侯下亦有都鄙之義故進都鄙
在上使文承邦國之後也

○乃施廩于官府而建其正立其貳設其攷陳其殷置
其輔

正謂冢宰大司徒之類貳謂小宰小司徒之類攷成
也佐成事者謂宰夫鄉師之類 坡謂此布治于官
府之事也收監長正參伍殷輔自建國時有之此謂

建立者蓋因施典灋則而示所以建官位事之意使君臣上下各任其職非施之後乃建之立之云云也且歲終令致事此申置之以見上慢下暴則有廢置之舉縣音賢監古銜反參七南反憊音任宅音他凡治以典待邦國之治以則待都鄙之治以灋待官府之治以官成待萬民之治以禮待賓客之治

總承上文言凡冢宰之治有此五者以此施之而令其治即以此待之而致其成也成八成也禮賓禮也

疏曰官成在八灋中今持出之者八成本待萬民不待官府也在八灋者欲見官府執行禮賓本在八統今特出之者以親親七者皆是王行之于上以示于民不必更別有禮惟禮賓特別有禮若聘禮之類也此皆言以者當別有篇卷

祀五帝則掌百官之誓戒與其具脩

五帝五色之帝而配以大皞炎帝黃帝少昊顓頊也誓戒要之以刑重失禮也明堂位所謂各揚其職百

官廢職服大刑是其辭之畧也其所當共脩掃除糞
洒

○前期十日帥執事而卜日遂戒

註曰前期前所諏之日也十日容散齋七日致齋三
日執事宗伯太卜之屬既卜又戒百官以始齋疏

曰四時迎氣冬至夏至郊祭等雖有常時常日猶須
審慎仍卜日故表記云不犯日月不違卜筮註日月
謂冬至夏至正月及四時也所不違者日與牲尸也假

令不吉改卜後日

○及執事祗滌濯

註曰執事初為祭事前祭日之夕滌濯謂溉祭器及
甌甌之屬

○及納亨贊王牲事

註曰納亨納牲將告殺謂鄉祭之晨既殺以授亨人
凡大祭祀君親牽牲大夫贊之 疏曰此祭天無裸
故先迎牲若宗廟之祭既裸而後迎牲也

○及祀之日贊玉幣爵之事

註曰日旦明也玉幣所以禮神玉與幣各如其方之色爵所以獻齊酒不用玉爵尚質也疏曰三者執以從王至祭所而授之王親自執玉幣奠于神坐親酌爵以獻尸

○祀大神亦亦如之

註曰大神亦謂天地

○享先王亦如之贊玉几玉爵

享不言大者欲見宗廟六享同然玉几所以依神天
子左右玉几宗廟獻用玉爵 疏曰享用玉爵天地
有爵但不用玉飾享用玉几天地亦應有質几不言
之者文不具 眡音視後同亦音祇要一遙反漑古
愛反廩魚善反鄉許亮反裸音灌舌字通用齊才計
反

大朝覲會同贊玉幣玉獻玉几玉爵

助王受此四者時見曰會殷見曰同大會同或于春

朝或於秋覲舉春秋則冬夏可知玉幣諸侯享幣也
以玉致之詳見小行人玉獻獻國珍異亦執玉以致
之玉几王所依者王朝諸侯立依前南面左右玉几
立而設几優尊也玉爵王裸諸侯而諸侯酢王用玉
爵 見賢通反朝直遙反

大喪贊贈玉舍玉

助嗣王為之也贈玉既窆所以送先王舍玉死者口
實天子以玉鄭司農云舍玉璧琮 舍戶暗反後同

寔波駮反

作大事則戒于百官贊王命

大事祭祀賓客喪荒軍旅田役凡稱大者大事也稱小者小治也贊王命助王為教令

王眡治朝則贊聽治

註曰治朝在路門外羣臣治事之朝王眡之則助王

平斷

○眡四方之聽朝亦如之

註曰謂王巡守在外時

○凡邦之小治則冢宰聽之待四方之賓客之小治

辭氏曰王者眡朝于路門之內冢宰有以聽邦之小治王者眡四方之朝冢宰為之待四方賓客之小治也邱氏曰賓客小治凡資糧之費饗殮幣帛之奉以至往來出入之期皆小治也

歲終則令百官府各正其治受其會聽其致事而詔王廢置

百官府三百六十官也正治正處其所治文書受會受其功事財用之計聽致事者聽斷其所致功狀也

○三歲則大計羣吏之治而誅賞之

註曰大無功不徒廢必罪之大有功不徒置必賞之
鄭司農云三載攷績

或問疏以經言邦國皆指諸侯子不從之何也曰
舉一例之如大宗伯以玉作六瑞以等邦國而曰
王執鎮圭則邦國不專為諸侯明矣曰官府萬民

畫邦國之有矣然則邦國將何指而經之安之之
等者又豈有出于官府萬民之外乎曰天子諸侯
自君身以至百度所以受條受理使大綱小紀各
得其分皆經邦國安邦國等事蓋兼上下該事物
而言也百官承流宣化之司也萬民則專指仰德
之倫也理雖一貫言有專指豈可混乎曰經何以
為理使畫一也曰試觀冢宰諸屬自王身之食息
起居以至財用出入官府內外大小之事皆有制

節謹度不敢佚縱非理使畫一乎曰紀何以為詳
理不遺也曰八統馭之九職任之九兩繫之其理
之也可謂詳且盡矣曰正何以為治朝位詔爵祿
之等曰夏官射人司士之職可攷 或問賦貢註
以賦為口泉貢為什一之稅又于云上求于下為
賦下納于上為貢子皆不從何也曰攷本經明有
賦貢二事註說得矣然口泉之灋三代則無之若
于說合賦貢為一求之于經多所未合詳見天府

問目 或問註以生為養言賢臣之老者王有以
養之子解異是何也曰此近解也今以春官內史
八枋參之內史之文自三曰廢以下皆以一善一
惡相間而五曰殺繼以六曰生以生次殺故知此
解長矣且註所引成王封伯禽者乃爵祿之事非
養也 或問三農後鄭謂原隰平地子改從司農
何也曰地官角人等職明著山澤之農且今山上
有田則目驗可知而地官稻人有稼澤之灋安得

不以經為斷乎曰閒民非載師所云無職事之民乎曰非也彼乃指惰游好閒者故罰以夫家之征此曰無常職則非無職也有夫有婦然後為家單貧之民未有室家未能受田子然似閒耳所指異也或問幣帛之式註為贈勞賓客子解違焉曰贈勞幣帛含在賓客式中矣且祭祀有禮神幣帛喪荒有凋委幣帛幣帛所用非止贈勞也故云然曰給作幣帛非工事之式乎曰司裘典婦功諸職

自在天官 或問註以牧為州長長為諸侯不亦
可乎曰諸侯亦有封域不徒以貴得民也孟子言
諸侯為天下之人牧而此經下文都鄙云建其長
故牧中疑兼諸侯而長為都鄙主也曰主為采邑
宰何據曰司徒泉府云都鄙從其主註曰謂別治
大夫故據彼以解此焉 問諏日何如曰出儀禮
少牢文諏謀也如祭用丁則十日前謀此丁日而
卜之吉則祭不吉則改卜後丁是也曰如此則郊

亦卜日矣故下文云祀大神祇亦如之曰郊特牲
亦有卜郊之文然曲禮曰大享不問卜僖三十一
年魯卜郊左氏傳曰禮不卜常祀公羊傳亦曰卜
郊非禮也則又似不卜日者又哀元年夏四月辛
巳郊穀梁傳曰我以十二月下辛卜正月上辛如
不從則以正月下辛卜二月上辛如不從則以二
月下辛卜三月上辛如不從則不郊矣則又似有
卜日者要當以經為信未可雜傳以疑經也

○小宰之職掌建邦之宮刑以治王宮之政令凡宮之糾禁

宮刑在王宮中者之刑王宮路寢一小寢五凡宮兼后宮而言也既發者糾舉之未發者禁止之 鄭剛

中曰欲治其國先齊其家人君雖正身以齊家苟不用刑以威之則或恃恩而無所畏然齊家用刑則傷恩故使大臣馭之以刑也灋在大臣恩在人主家其有不齊乎

掌邦之六典八灋八則之貳以逆邦國都鄙官府之治
貳副也逆迎受勾攷之使知功過所在也

執邦之九貢九賦九式之貳以均財節邦用

均者量貢賦之入均之以應九式之用也節者非其
式不之用則自節矣

以官府之六敘正羣吏

坡謂此即八灋之官常也敘秩次也謂先尊後卑也

一曰以敘正其位

正其位正其朝列上下之位也

二曰以敘進其治

進作之使前也進其治者尊卑各有分治以敘進之使尊者理大卑者共小也

三曰以敘作其事

作起也作其事者振起之使及時修舉也黃氏曰以敘進其治未嘗不欲其治也又惡其陵節犯上出位邀功故以敘進之顏靡廢曠不可以不戒也則又

以敘作其事

四曰以敘制其食

註曰食祿之多少

五曰以敘受其會

疏曰歲終進會計文書受之亦先尊後卑也

六曰以敘聽其情

註曰情爭訟之辭 王介甫曰自會以上不得其情

而至于訟訟則各以其敘聽之 坡謂自一至三施

功之事也自四至六程績之事也 會古外反註同

共音恭

以官府之六屬舉邦治一曰天官其屬六十掌邦治
大事則從其長小事則專達

達決也 疏曰大事從其長者謂若膳夫食官之長
則下庖人內外饗亨人有事皆來諮白膳夫小事則
專達者謂若宮人掌舍無大事無長官可諮自專行
事以下五官皆如此類也

二曰地官其屬六十掌邦教大事則從其長小事則專達三曰春官其屬六十掌邦禮大事則從其長小事則專達四曰夏官其屬六十掌邦政大事則從其長小事則專達五曰秋官其屬六十掌邦刑大事則從其長小事則專達六曰冬官其屬六十掌邦事大事則從其長小事則專達

上文言百官各有其治與事此經承之一以見官盛任使立長官必有屬官佐之然後治可立事可修也

一以見為治行事之體要使卑者不至以小謀敗大作尊者無以蔽脛墮庶務也故有天地春夏秋冬之屬則位列矣有治教禮政刑事之治則治具矣大事從長小事專達則事別矣正者正此者也進者進此者也作者作此者也 藪音叢

以官府之六職辨邦治

疏曰六官所職不同邦治得有分辨故云辨邦治也
一曰治職以平邦國以均萬民以節財用

治典曰經曰紀此曰平曰均者執經而理之則平循
紀而治之則均也節財用者劉原父曰邦國制度由
天官以裁處故以節財用為職否則制度崇而力不
能供矣

二曰教職以安邦國以寧萬民以懷賓客

註曰懷亦安也賓客來共其委積所以安之 疏曰
教典云擾萬民此云寧擾為馴馴則寧義無異也

三曰禮職以和邦國以諧萬民以事鬼神

王介甫曰邦國不和則無與事其先王萬民不諧則無與致其裡祀故禮職以和邦國諧萬民而後以事鬼神也

四曰政職以服邦國以正萬民以聚百物

註曰聚百物者司馬主九畿職方制其貢各以其所有
王介甫曰政典平邦國政官之屬推而行之然
後有以服邦國

五曰刑職以詰邦國以糾萬民以除盜賊六曰事職以

富邦國以養萬民以生百物

坡謂六職無百官者使官治典則治之教之等事在中矣承上文立長帥屬而使之各揚其職皆所以為邦國萬民也 積子賜反

以官府之六聯合邦治一曰祭祀之聯事二曰賓客之聯事三曰喪荒之聯事四曰軍旅之聯事五曰田役之聯事六曰斂弛之聯事凡小事皆有聯

葉氏曰大宰以官聯會官治舉其要也小宰以六聯

合邦治分其詳也以祭祀言之宗伯而下鬱地尊彝
典祀等職皆聯事也而太宰則贊玉幣司徒奉牛司
馬奉魚司寇奉犬此非他官之合聯乎以賓客言之
行人而下司儀環人掌客等職皆聯事也而大宰則
贊玉幣宰夫掌宰禮司徒修委積封人飾牛牲此非
他官之合聯乎大宰贊舍鄉師治役司徒荒政小行
人令調委此喪荒之聯事也司馬治軍司徒治民小
宰掌具縣師受灋此軍旅之聯事也司馬教陣司徒

致民鄉師師民徒司馬與慮事此田役之聯事也大
宰掌貢賦司徒制地貢司徒弛民力鄉大夫舍賢能
之類此斂弛之聯事也六官聯事不一而足以至小
事莫不有聯典祀征役于司隸鼓人詔鼓于大僕掌
戮致甸師之殺蠻隸執校人之役鄉師攷辟于司空
稍人聽政于司馬有同寅協恭而非畔官離次有聯
事合治而無分朋植黨此官治之所以會而邦治之
所以合也 坡謂上言六職此六者為事最大用人

最多非一職之所能治故以六聯合之 弛音弛

以官府之八成經邦治

疏曰官府中有此八事皆是舊灋成事品式依而行
之以經紀邦國之政治 坡謂六聯行于朝家八成
施于萬民者其序如此

一曰聽政役以比居

註曰政謂賦也凡其字或作政或作正或作征以多
言之宜從征比居謂伍籍也比地為伍以伍籍者平

而無遺脫也

二曰聽師田以簡稽

註曰簡稽士卒兵器簿書簡猶閱也稽猶計也合也
合計其士之卒伍閱其兵器為之要簿也

三曰聽閭里以版圖

註曰鄭司農曰版戶籍圖地圖也聽人訟地者以版
圖決之易彥祥曰欲校登其閭里人民之數則以版
圖聽之

四曰聽稱責以傅別

註曰稱責謂舉責生子傅傅著約束於文書別別為
兩兩家各得一也

五曰聽祿位以禮命

坡謂祿位謂庶人在官者受祿於官視百畝之分則
祿有多少有府史胥徒之別則位有先後當亦有禮
命以等之

六曰聽取予以書契

坡謂取予者如司徒散利遺人施惠之等官予之民
取之也書契謂出予受入之凡要酒正云凡有秩酒
者以書契授之

七曰聽賣買以質劑

註曰質劑謂兩書一札同而別之長曰質短曰劑傳
別質劑皆今之券書也事異異其名耳

八曰聽出入以要會

坡謂出入如泉府之賒者貸者出也受其輸還入也

旅師之春頒出也秋斂入也泉府曰歲終則會其出入是出入之要會也其上四者民治于官有公私之序焉其下四者官交于民有大小之序焉聽待也或
以此待其治或以此決其爭皆聽也 此毗志反予
音與註同會古外反註同著直畧反

以聽官府之六計弊羣吏之治一曰廉善二曰廉能
三曰廉敬四曰廉正五曰廉灋六曰廉辨

聽待也弊斷也既斷以六事又以廉為本 坡謂善

者持身及物皆有善而無惡也能展拓有為也敬不
解于位也正行無傾邪也灋守灋不失也辨辨不疑
惑也六者因其學問材質之高下各有次第今不盡

釋也 解音懈

以灋掌祭祀朝覲會同賓客之戒具軍旅田役喪荒
亦如之七事者令百官府共其財用治其施舍聽其治
訟

此大宰八灋中所謂六曰官灋者也灋謂其禮灋也

祭祀以下七者即上六聯然六聯不言朝覲會同者以彼賓客中可以兼之耳六聯言百官聯之此言少宰以灋掌而令之也戒具戒官有事者所當共施舍不給役者治訟王介甫曰理其事謂之治爭其事謂之訟財用在于官府而施舍加于人民治訟則或以財用之不共或以施舍之不治故先言其財用次言治其施舍後言聽其治訟 共音恭後同施讀為弛舍音捨

凡祭祀贊玉幣爵之事裸將之事

大宰職祀五帝贊玉幣爵今又贊此三者是從大宰助王也將送也裸送送裸謂贊王酌鬱鬯以獻尸謂之裸裸之言灌也明不為飲主以祭祀唯人道宗廟有裸天地大神至尊不裸莫稱焉凡鬱鬯尸受祭之啐之奠之裸古亂反註同啐寸對反

凡賓客贊裸凡受爵之事凡受幣之事

註曰唯裸助宗伯其餘皆助大宰王不酌賓客而有

受酢 疏曰賓酢王爵大宰受于賓以授王王卒飲
大宰受爵以授小宰受幣之時王親受以授大宰大
宰以授小宰也

喪荒受其含襚幣玉之事

上大宰不言則此乃小宰專受之喪謂王喪諸侯諸
臣有致含襚幣玉之禮口實曰含衣服曰襚凶荒有
幣玉者賓客所調委之禮 襚音遂調音周
月終則以官府之斂受羣吏之要

註曰主每月之小計 疏曰受之當先尊後卑故言
敘

○贊冢宰受歲會歲終則令羣吏致事

註曰使齋歲盡文書來至若今上計 坡謂歲終八

字當在贊冢宰之前

正歲帥治官之屬而觀治象之灋徇以木鐸曰不用灋
者國有常刑

註曰正歲謂夏之正月得四時之正以出教令者審

也古者將有新令必奮木鐸以警衆使明聽也鐸皆以金為之以木為舌則曰木鐸也文事奮木鐸武事奮金鐸 坡謂治象乃正月大宰所施于官府者至此小宰乃帥官屬觀之也正月施之者王家之典正歲觀之者人功之始也

○乃退以宮刑憲禁于王宮令于百官府曰各修乃職致乃瀆待乃事以聽王命其有不共則國有大刑

憲謂表縣之上文專指治官之屬此宮中之官府所

該者衆若師氏大僕之等凡在王宮者皆是也有職則有灋修之政之以待其事之至而聽命于王也大刑者尊君之誠專故近君之灋嚴也此二節即八灋之官刑以糾邦治者也 憲讀為懸縣同

或問以六敘為官常何也曰大宰有官常而無六敘小宰之文官屬七者具列獨不著官常而別有六敘依類相當亦已明已且此經位以敘正之治以敘進之事以敘作之是使諸官各揚其常職之

所當為謂之官常不亦近乎曰註以治為功狀不
從何也曰治為功狀與受其會之會無別且正之
作之制之受之聽之皆小宰也而獨以進其治為
下進于上文既不類況進其功狀矣方曰作其事
語亦非倫也曰進其治如子解與作其事何別曰
以食官諸屬譬之如膳夫掌王食之治其屬庖人
掌畜之治內饗掌內割亨之治外饗掌外割亨之
治皆治也於一職之中如膳夫之授祭嘗食徹胙

俎為獻主庖人之共王后世子共賓祭喪紀之類
則治中之事也推此可見矣治其大綱也事其節
目也 或問稱責疏舉泉府以為民貸于官何如
曰此專指在民貸于民者不兼在官故司寇朝士
職云凡有責者有判書以治則聽乃指萬民言之
是不當異也曰祿位如註言乃指侯伯卿士之等
子何違焉曰如註言則為官府之治矣此八成乃
待萬民之治也忽而雜以此言不亦不倫乎且正

其位制其食上文六敘已具之藉謂爭祿之多少
位之先後亦當舍在以敘聽其情之中不當在此
也曰府史胥徒不命者也何以有禮命曰子男之
士亦不命者何以在典命況諸官之下明云府史
幾人胥徒幾人是皆著籍朝家者安得無禮命乎
惜乎司祿既闕無從攷其由來然孟子之書猶可
見其大槩也曰聽出入以要會疏謂官內自用物
有人爭此官物者以要會聽之如何曰無是事且

官出之人有爭可也官入之人何爭乎

宰夫之職掌治朝之灋以正王及三公六卿大夫羣吏之位掌其禁令

註曰治朝在路門之外其位司士掌馬宰夫察其不如儀王龜齡曰羣吏則司士所列在路門之左右者坡謂此以敘正其位之事也

敘羣吏之治以待賓客之令諸臣之復萬民之逆

羣吏有事于賓者宗伯行人等官有事于復逆者大

僕小臣御僕之屬宰夫恒次敘其職事三者之來則
應使辦理之諸臣三公孤卿及諸侯也復之言報也
反也反報于王謂于朝廷奏事萬民羣吏庶民也自
下而上曰逆逆謂上書

掌百官府之徵令辨其八職一曰正掌官灋以治要
二曰師掌官成以治凡三曰司掌官灋以治目四曰
旅掌官常以治數五曰府掌官契以治藏六曰史掌
官書以贊治七曰胥掌官敎以治敎八曰徒掌官令以

徵令

別異諸官之八職以備王之徵召正六卿為屬之長者師六職中每事之長官皆是為屬所受教曰師司長官之屬各司其職也旅衆下士也官成謂當司之成式成事非待萬民之八成也司亦曰掌官灋者正之官灋乃八灋治官之灋兼八灋言之也司之官灋乃官灋正邦之灋八灋中之一也治要者必持大灋大灋既得則師惟稟其成而已師有成灋則司循灋

以治而已行灋有常則旅如常以共而已要事之要
領也凡要中之凡事也目凡事中之節目也數目中
之繁簡也尊者兼之卑者專之尊者畧之卑者詳之
治藏藏文書及器物贊治若今起文書草也治敎官
中須人役使則科次其徒也徵令趨走給招呼 藏
才浪反註治藏同別彼列反

掌治灋以致百官府羣都縣鄙之治

治灋即六典八灋八則也羣都諸采邑也六遂五百

家為鄙五鄙為縣言縣鄙而六鄉州黨亦存焉大宰
出法以治之小宰守灋以逆之宰夫循灋以攷之

○乘其財用之出入凡失財用物辟名者以官刑詔
冢宰而誅之其足用長財善物者賞之

乘猶計也財用之出九式也財用之入九功九賦也
鄭剛中曰人能于財利之際不萌貪欲之心者廉吏
也故攷吏治而以乘財用為急財泉穀也用貨賄也
物畜獸也辟名詐為書以空作見文書與實不相應

也大宰出灋以制之小宰守法以均節之宰夫循灋以勾攷之坡謂自敘羣吏之治至此皆以敘進其治之事也辟音擊反音僻見賢遍反

以式灋掌祭祀之戒具與其薦羞從大宰而眡滌濯

註曰薦脯醢也羞庶羞內羞疏曰祭祀大小皆有舊灋式依而戒敕使共具之

○凡禮事贊小宰比官府之具

註曰比校次之疏曰上小宰於七事已言以灋掌

戒具此宰夫贊小宰校次之使知善惡足否也 比

音彼

凡朝覲會同賓客以牢禮之灋掌其牢禮委積膳獻飲
食賓賜之殮牽與其陳數

牢禮之灋者多少之差與其致之之時也三牲牛羊
豕具為一牢掌其牢禮者下別言委積之等則此牢
禮乃饗餼也委積謂牢米芻薪給賓客道用也委積
在道所設饗在聘日而先言者以饗餼是禮之大且

委積非直賓來共之賓去亦共之在下亦其宜膳掌
容所云上公殷膳大牢之等也獻掌容所云上公乘
禽日九十雙之等也飲行人所云上公饗禮九獻之
等也食行人所云上公食禮九舉之等也賓賜者以
賓之故而賜其羣下也殮客始至時所致禮牽牲牢
可牽而行者殮牢皆殺而曰殮牽者以掌容云積眠
殮牽據積而言之也賓賜之殮牽者賓之羣下往來
皆有積及國亦有殮饗餼獨言積之殮牽者舉始終

以色諸禮也此等之禮皆掌客所主宰夫雖非正職
以其主陳當知其數故言之耳委積之積子賜反
此二字相連皆同食音嗣註同

凡邦之弔事掌其戒令與其幣器財用凡所共者

註曰弔事弔諸侯諸臣幣所用賻也器所致明器也
凡喪始死弔而含襚葬而賵贈其間加恩厚則有賻
焉疏曰謂王使人弔諸侯自弔諸臣須從王行者
并有贈喪之具百官當共故宰夫總戒令之與幣器

財用凡所共者也

○大喪小喪掌小官之戒令帥執事而治之

註曰大喪王后世子也小喪夫人以下小官士也其
大官則冢宰掌其戒令治謂共辨

○三公六卿之喪與職喪帥官有司而治之凡諸大夫
之喪使其旅帥有司而治之

旅冢宰下士官有司者有事于喪冢之官有司也

坡謂自以式灋至此皆以敎作其事之事也 辨簿

覓反

歲終則令羣吏正歲會月終則令正月要旬終則令
正日成而以致其治治不以時舉者以告而誅之

註曰歲終自周季冬正猶定也旬十日也治不時舉
者謂違時令失期會 王氏曰後世不知要會之灋
故文書愈詳而愈不可致詰具文而已 坡謂此以
敘受其會之事也註云歲終自周季冬確矣何也周
之以十一月為正月凡見于經傳及諸儒之說萬無

可疑者獨至以仲冬為首春建亥為季冬則論者紛
然惟成十七年九月辛卯用郊穀梁傳曰夏之始可
以承春以秋之末承春之始蓋不可矣夫周九月夏
七月也而以為秋末自可為改時據者即前大宰正
月之吉下所引朱子之言猶未斷周之果不以冬為
春也故鄭註之云私心竊是焉 又按豳風十月之
後曰改歲則建子為正可知也十月穫稻為此春酒
此者非久之辭十月為此春酒擬後月用之也古者

臨事方作酒儀禮少牢先期旬有一日祭日得卜宰
乃命為酒是也上十月曰為此春酒下十月曰朋酒
躋堂則建子為春可知矣 會古外反註期會如字

正歲則以灋警戒羣吏令修宮中之職事

鄭司農曰正歲之正月以灋戒勅羣吏

○書其能者與其良者而以告于上

註曰良猶善也上謂小宰大宰也 疏曰上云令修
宮中之職事則此謂宮中吏也正歲則預選之擬至

歲終當舉之也

或問要凡目數可得辟乎曰辟于冢宰如治典是要也于治之中如小宰掌宮刑膳夫食飲之類是凡也于凡之中如宮正掌宮中官府宮伯掌士庶子庖人掌畜內饗掌內亨之類是凡之目也于目之中如宮正一職自有比官府辨內外之事是目之數也曰官成為八成不亦可乎曰師之所掌內而王身外而祭祀賓客諸大事非盡于八成而已也亦有說乎曰若必以

為小宰八成則司冠士師亦有八成欲兼之乎否乎
若必以官灋官成官常皆見于八灋不得有異辭則
官契官書官叙官令豈嘗見于八灋將何以解乎如
此之類當在攷其意義之合泥則窒矣 辟音譬

○宮正掌王宮之戒令糾禁

戒其逸怠令其當為糾其過惡禁其未然

以時比宮中之官府次舍之衆寡

註曰時四時比校次其人之在否官府之在宮中者

若膳夫王府內宰內史之屬次諸吏直宿若今部署
諸廬者舍其所居寺

為之版以待

註曰版其人之名籍待待戒令及比

夕擊柝而比之

註曰夕莫也莫行夜以比直宿者為其有解惰離部
署鄭司農云柝戒守者所擊也

○國有故則令宿其比亦如之

註曰鄭司農云故謂禍災令宿宿衛王宮玄謂故凡非常也文王世子曰公有出疆之政庶子以公族之無事者守于公宮正室守大廟諸父守貴官貴室諸子諸孫守下宮下室此謂諸侯也王之庶子職掌國子之倅國有大事則帥國子而致于太子唯所用之者令宿之事蓋亦存焉坡謂自時比至此皆比官府之事析吐各反註同莫音暮行下孟反解佳賣反倅七內反

辨外內而時禁

外宮中卿大夫士也內奄寺之等禁其非時出入恐
外內交通伺王動靜以為非也

稽其功緒糾其德行

稽猶攷也計也功吏職也緒其志業在身為德施之
為行

幾其出入均其稍食

幾其出入謂微察羣吏之出入也稍食祿廩

去其淫怠與其奇衰之民

註曰民宮中吏之家人也淫放濫也怠懈慢也奇衰
譎觚非常

會其什伍而教之道藝

疏曰宮正掌宮中吏亦兼掌其子弟會會合子弟也
五人為伍二伍為什會之者使之宿衛時語言相體
服容相識是其輩作也及其學問又相親及切磋是
其輩學也以相勸帥且寄宿衛之令焉道謂先王所

以教道民者藝謂禮樂射御書數 坡謂自辨外內
至均其稍食所以使卿士大夫之身一歸于正無迪
上以非典也而又恐因隸僮子弟以奪其志行故去
之會而教之則官府之奉公守職益專一不紛且其
子孫敬而成材則官之皆忠厚之意也

月終則會其稍食歲終則會其行事

行事吏職也自辨外內至此皆飭官中吏治之事

奇音羈哀似嗟反亦作邪後同則會古外反

凡邦之大事令于王宮之官府次舍無去守而聽政令
大事解見冢宰使居其處待所為

春秋以木鐸修火禁

大火以季春出以季秋入凡陶冶鑄銅之火因天出
火民則為之因天入火民則休之此修火禁者謂宮
正于宮中特宜慎火故修之

凡邦之事蹕宮中廟中則執燭

註曰事祭事也邦之祭社稷七祀于宮中祭先王先

公於廟中隸僕掌蹕行者宮正則執燭以為明春秋
傳曰有大事于大廟又曰有事于武宮 蹕音畢

大喪則授廬舍辨其親疏貴賤之居

廬倚廬也於路門之外東壁倚木為廬舍聖室也兩
下為之與廬異親者貴者居倚廬疏者賤者居聖室
自凡邦之大事至此皆隨時以修宮中之政 聖鳥
各反

或問本經言社稷五祀而註言七祀何也曰宗伯

之社稷五祀註依左傳蔡墨以重該修熙犁句龍
五色之臣為五祀在四郊不在宮中此言宮中當
是祭灋所謂司命中霤門行戶竈泰厲之祀也然
攷之本經司命自屬天神而泰厲又無明文是所
可疑也特以天子立宮則中霤門行戶竈在所當
祀而諸侯祭因國之在其地而無主後者推之天
子而祭泰厲理亦宜爾註說未可廢也凡此之類
因仍其舊慎而闕之聊附所疑未敢臆斷矣註引

春秋傳者疏云欲見隸僕蹕于宮中亦得兼廟中
公羊云魯公稱世室羣公稱宮則天子之廟亦有
宮稱也 句音勾

○宮伯掌王宮之士庶子凡在版者

註曰鄭司農云版名籍也以版為之今時鄉戶籍謂
之戶版玄謂王宮之士謂王宮中諸吏之適子也庶
子其支庶也

掌其政令行其秩敘作其徒役之事

註曰秩祿稟也敎才等也作徒役之事天子所用

適丁歷反

授八次八舍之職事

註曰衛王宮者必居四角四中於徽候便也次其宿
衛所在舍其休沐之處王介甫曰職事宿衛之職
事也

若邦有大事作宮衆則令之

註曰謂王宮之士庶子於邦有大事或選當行

月終則均秩歲終則均敘


宮伯掌之則為政令士庶子任之則為職事內而國中徒役之事則作之外而大事之作則令之凡秩敘行之至于月終歲終則均之 徼古弔反

以時頒其衣裘掌其誅賞

註曰頒讀為班班布也衣裘若今賦冬夏衣 陳氏

曰凡環衛有二等其一是公卿大夫之子弟分置八隅宮伯領之其一是官府凡在宮庭者徒役錯置於

士庶子八次八舍之間周列環衛以周王宮宮正領
之二者皆環列之衛至于人主切身侍御僕從則令
掌于大僕故宮正宮伯所掌是總于大宰



周禮述註卷二